

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Bon bini riba nos plenchi di skol. Nos a drenta e simannan di preparashon pa Pasku. Promé nos vigilia, despues fiesta di Kristu Rey. Anto lo kana drenta advènt rumbo pa Pasku di nasementu.

Ta un temporada di fiesta, di selebrá bida i pordon. Pero tambe ta temporada pa nos duna na nos próhimo. Duna ekstra amor, komparti kuminda, komparti paña. Kompartí tempu ta asina importante, no ku esnan ku semper bo ta huntu ku ne, buska esnan tambe ku no sa mirabu hopi pa asina boso por komparti tempu kombersando.

Un felis fin di siman yená ku amor i pas.

Riba roster

Regina Pacis VSBO

Nos di Regina Pacis ta yamabu bon bini riba plenchi di Regina.

Pa e materia atministrashon klas 3 mester a traha un : island display usando e tema Regata. Un island display ta un promoshon di artíkulo. Den e kaso akí mester a promové un pakus di mangel. Alumnonan mester a usa nan kreatividad pa traha e tarea ku mangel.



Selebrashon di Kultura na Regina Pacis VSBO

Aunke no tabatin posibilidat di selebrá siman di kultura en grande, tòg kuerno dosente di Regina Pacis a regalá su alumnonan un dia edukativo pa honra nos historia i tradishon. Mainta a habri ku himno, algu masha importante pa inklulká patriotismo den nos muchanan. Durante e promé parti di mainta a proyektá e pelíkula "Tula, the revolt", un film ku a presentá na okashon di 150 aña di abolishon di sklabilitut. Historia di Tula ta reflehá historia di tur katibu, pues historia di hopi yu di Kòrsou, desendiente di katibu. Asina Regina Pacis a duna su alumnonan algu di nan historia i alabes a konsientisá nan di e drama di sklabilitut ku bou di ningun sirkunstansia tin ku ripití. Alumnonan a haña un imágen tangibel di e lucha di katibunan, personifiká den Tula, pa rekuperá nan libertat i spesialmente nan dignidat di hende. Durante pousa a trit kokada, tentalaria i ko'i lechi huntu ku aw'i lamunchi. Despues di pousa, alumnonan a partisipá na diferente wega manera ninichi, kareda ku saku, kana ku kuchara, Anna Maria koek koek. Tur e weganan di ántes akí a pone e muchanan pensa. Nan a kompartí, hari, reta otro i nan a komprendé spesialmente ku no ta nesesario tin un telefòn konstantemente den nan man pa pasa bon. Weganan simpel na airu liber tambe por ta fùn.

Meta di e mainta tabata laga e muchanan komprendé a traves di historia i divershon kon importante ta pa nos konosé nos pasado i mantené nos tradishonnan pasobra nan ta fundeshi di nos futuro.



Not'é riba bòrchi

John F. Kennedy school

Aktivitatnan ku ta sosodé regularmente na John F. Kennedy school:

“Niveau lezen”

Tur djaluna i djamars mainta di 8:00-8:45nos tin “niveau lezen”. Nos tin “leesouder” ta drenta skol i bin lesa ku nos alumnonan. Nos ta parti henter skol den grupo di 3 of 4 alumno, a base di nan nivel di lesa hulandés. Kada grupo ta lesa ku un leesouder, maestra òf stazjèr. Mayoria di nos “leesouder” nan ta parokianonan di misa di Groot Kwartier.

E parokianonan di djaluna ta drenta skol ora misa di 7or kaba pa lesa ku e alumnonan. Nos tin parokianonan ku ta bin riba djamars maske e dia ei no tin misa mainta. E atenshon individual ku e alumno nan ta haña pa ku lesamentu riba su mes i idioma Hulandés en partikular, ta motivá e alumnonan pa nan hasi nan bèst. Tambe e ta yuda e alumnonan enormemente pa drecha nan nivel di lesamentu i komprondementu di e idioma hulandés. “Leesouder” nan masha danki nos ta apresia boso sostén.

“Spelletjesdag”

Tur kuminsamentu di aña eskolar nos tin un “spelletjesdag”. Esaki ta un sorto di “teambuilding” pa e alumnonan. E dia aki nos no tin kompetensha. E alumnonan ta partisipá na diferente wega ku e meta pa siña traha huntu i demostrá un komportashon deportivo. Nos ta parti henter skol den grupo di 5 òf 6 alumno di diferente edat. Esnan mas grandi ta lider di e grupo i ta guia esnan mas chikí den e weganan. Na kada wega tin un maestro pa sostené e grupo. Tin varios wega kaminda koperashon di henter e grupo ta nesesario pa por ehekutá e akshon nan nesesario. Riba e potrètnan nos por mira algun di e weganan. Na final di e dia ta evaluá kua grupo a destaká riba e nivel di traha huntu i riba e nivel di komportashon deportivo. Tambe nos ta evaluá ku alumnonan ku no a destaká pero a demostrá adelanto den nan komportashon i nan kolaborashon ku otro. Di e manera aki tur e alumnonan grandi i chiki ta sera konosí ku otro i ta siña respetá otro i koperá ku otro pa forma e famia di John F. Kennedy school.

“Pauze”

Serka nos na John F. Kennedy school deporte tin un ròl hopi importante. Djamars nos alumnonan ku no sa landa, ta bai lès di landamentu na asiento. Riba djaweps nos alumnonan tin lès di gem. Nos maestro di gem sa organisá kompetensha ku e otro skolnan i aña pasá nos a bira kampion di vòley. Tur dia nos alumnonan ta hasi deporte den ora di pouze. E mucha hòmbenan gusta hunga futbòl. Tur dia dos grupo ta midi forza ku otro. Durante di e weganan aki tambe nos ta enfatisá riba nan komportashon deportivo i koperashon ku otro. Mester tra den tim pa por logra hinka gol. Di e manera aki nos ta tra tur dia riba nos lema ku ta: “ un skol positivo ku ta promové pas”.





Den agènda

21 desember te ku 4 yanuari

Un prenci

Señor Felix Razenberg di stichting Verus, ta entregá algun buki interesante riba identidat i edukashon na sra. van Lamoen-Garmers



Mucha djispou

Siegfried ku Randolf ta kombersá riba e tópiko “hende muhé”.

Siegfried: “Mi kasa a drumi soña ayera nochi ku e tabata kasá ku un milionario”

Randolf: “Abo si tin suerte. Di mi ta soña meskos pero ku wowo habri pará dilanti di e pakus di mas karo, den e mall di mas karo na merka.”